

Rapport dalla sessiun dil cussegl da vischnaunca dils 18-11-2013

Tractanda 1

Approbaziun dil protocol dalla sessiun dils 30-09-2013

Il protocol dalla sessiun dils 30-09-2013 vegn approbaus en votaziun unanima cun engraziament.

Tractanda 2

Eleczion d'in(a) commember(a) per il cussegl da fundaziun Casa s. Martin per il rest dalla perioda d'uffeci 2012-2014

Entras la mort digl anteriur commember Plazi Decurtins ei in post enteifer il cussegl da fundaziun Casa s. Martin vegnius vacants. Ulteriurmein apparteneva Plazi Decurtins era alla cumissiun casa dalla casa s. Martin. Il cussegl da fundaziun elegia ord lur miez in(a) representant(a) per remplazzar leu la vacanza da Plazi Decurtins.

La suprastonza communal ha fatg patratgs davart l'occupaziun dil post vacant e propona d'eleger la canzlista communal, Sandra Gautschi, en la fundaziun Casa s. Martin.

Cun 14 : 0 vuschs elegia il cussegl da vischnaunca Sandra Gautschi en il cussegl da fundaziun dalla Casa s. Martin per il rest dalla perioda d'uffeci 2012-2014.

Tractanda 3

Eleczion d'ina cumissiun da baghegiar per il project Campadi Ogna

Il 20 d'october 2013 ha il pievel approbau il credit per il niev Campadi Ogna. Sco in dils proxims pass duei ina cumissiun da baghegiar vegnir installada.

La cumissiun da baghegiar ha l'incarica da luvrar ora il project en detagl e decider davart caussas executoricas che stattan en connex cun las lavurs da construcziun.

Cun 14 : 0 vuschs elegia il cussegl da vischnaunca suandontas personas en la cumissiun da baghegiar Campadi Ogna:

- **Donat Nay**, representant suprastonza communal
- **Flurin Decurtins**, representant cussegl da vischnaunca
- **Patricia Trento**, representanta cussegl da vischnaunca
- **Dumeni Tomaschett**, representant Trun Turissem
- **Curdin Tuor**, representant Trun egl avegnir

Tractanda 4

Preventiv pigl onn 2014

Il preventiv dil quen current siara tier expensas da frs. 8'315'700.00 ed entradas da frs. 8'407'800.00 cun in gudogn da frs. 92'100 sunter haver fatg amortisaziuns ordinarias en la grondezia da frs. 742'500.00 inclus frs. 29'000.00 tier la sparta canalisaziun e frs. 13'500.00 tier l'ovra hidraulica Runcalatsch. Plinavon ei previu amortisaziuns supplementaras da frs. 600'000.00. Il gudogn avon amortisaziuns contonscha la summa da frs. 1'539'100.00.

Il preventiv d'investiziuns siara tier expensas da frs. 2'510'000.00 ed entradas da frs. 680'000.00 cun in surpli d'investiziuns da frs.1'830'000.00.

Las posiziuns secumponan ord:

620.501.17	Sanaziun da vias communalas	frs.	500'000.00
620.501.30	Parcadis scola (project Casa s. Martin)	frs.	60'000.00
710.501	Investiziuns canalisaziun communalas	frs.	140'000.00
710.502	Investiziuns GEP/cataster	frs.	60'000.00
710.503	Dumbraders d'aua	frs.	200'000.00
760.501	Project sanaziun ustonzas e vias d'uaul	frs.	840'000.00
790.581	Revisiun planisaziun locala	frs.	45'000.00
810.506.01	Maschinas communalas	frs.	100'000.00
830.524	Aczias Campadi Ogna	frs.	565'000.00

Il preventiv 2014 vegn presentaus dalla canzlista communalas Sandra Gautschi e discussiunaus dil cussegl da vischnaunca en detagl.

Il cussegl decida cun 14 : 0 vuschs da proponer per mauns dalla radunonza da vischnaunca d'approbar:

- **il preventiv dil quen current che siara cun expensas da frs. 8'315'700.00 ed entradas da frs. 8'407'800.00, pia cun in gudogn da frs. 92'100.00.**
- **il preventiv dil quen d'investiziuns che siara tier expensas da frs. 2'510'000.00 ed entradas da frs. 680'000.00 cun in surpli d'expensas da frs. 1'830'000.00.**

Tractanda 5 **Fixaziun dil pei da taglia per igl onn 2014**

La suprastonza communalas e la cumissiun da gestiun han examinau il fatg ed ein digl avis da star per igl onn 2014 sin in pei da taglia da 105%.

Il cussegl propona cun 14 : 0 vuschs per mauns dalla radunonza da vischnaunca da fixar la taglia communalas per igl onn 2014 sin 105% dalla taglia cantunala semplas.

Tractanda 6 **Pusseivladad da tschentiar damondas**

Dalla pusseivladad da tschentiar damondas vegn fatg diever.

Per il cussegl da vischnaunca

Il president
Flurin Decurtins

L'acturara
Sandra Gautschi